

Kingusinnerpaamik UKA2019-imi inuussutissarsiornermik siuarsaanermik aaqqissuussinerit maanna ingerlasut nalilersorneqarnerannik Naalakkersuisut saqqummiussinissaat pillugu Inatsisartunut aalajangiiffigisassatut siunnersuut. Nalilersuineri aaqqissuussinerit maanna ingerlasut suliffeqarfinnik suliaqarfinnillu nutaanik qanoq annertutigisumik siuarsaanerat qulaajaavigineqassaaq. Nalilersuinermilu namminersorlutik inuussutissarsiortunut maanna sinaakktissatut atugassarititat ilanngunneqassapput, maannalu aaqqissuussinernut kiisalu manna tikillugu misilittagaareersut tunuliaqutaralugit sinaakktissanut aaqqiissutaasinnaasunillu pitsanngorsaatinillu siunnersuusiortoqarluni. Nalilersuinermik suliaqarnermi namminersorlutik inuussutissarsiortut qanimut suleqatigineqarnissaannik Naalakkersuisut kaammattorneqarput.

(Mute Bourup Egede, Inuit Ataqtigiit)

Akissuteqaat

(Inuussutissarsiornermut Nukissiuuteqarnermullu Naalakkersuisoq)

Aappassaaneerera

Naalakkersuisut sinnerlugit Inuussutissarsiornermut Aatsitassanullu Ataatsimiititaliaq qutsavigerusuppara isumaliutissiissutaannut sukumiisumut.

Naalakkersuisut maluginiarpaat ataatsimiititaliami amerlanerussuteqartut inuussutissarsiornermik siuarsaanermik aaqqissuussinerit atuuttut nalilersornerat aamma namminersorlutik inuussutissarsiortunut sinaakktissat pillugit nalunaajaat akuerineqarnissaa inassutigimmassuk.

Oqaatigineqassaaq ataatsimiititaliap assut naammaginantimmagu Naalakkersuisut sunniutiniq uuttuinermik annertuumik ingerlatsiniarlutik aallarneereersimammata. Taamaammat Naalakkersuisut nunatta karsiata kukkunersiuisuisa ilanngutitinneqarnissaat isumaqatigaat, suliaq inaarutaasoq aamma annertoq tamatuma saniatigut pitsaassutsimigut qulakkeerneqassammat.

Tamatuma saniatigut Naalakkersuisut naammagisimaarlugu tusaatissatut tiguat ataatsimiititaliap kissaatigimmagu sunniutiniq uuttuineq inatsisit aamma aaqqissuussat aallarnisaasarnermut attuumassuteqartut pisariillisarneqarnissaat isiginiarneqassasoq. Sunniutiniq uuttuineq siunertaq taanna pissutigierpiarlugu aallarneqarsimavoq, inatsisit aamma aaqqissuussat aallarnisaasarnermut inuussutissarsiornermullu attuumassuteqartut naammassuminarsarneqarnissaannut pisariillisarneqarnissaannullu sakkussanik tunissammatigut. Taamaattumik tamatuma tungaagut siunissami sulinitinnut aamma ilaatinneqassaaq.

Taama oqaaseqarlunga Inatsisartuni oqallittoqarlunissaa neriuutigaa.